

INUIT ATAQATIGIIT INATSIARTUNI



UPA2023/173

Agathe Fontain

Meeqqat piitsuussusaannut, ajornartorsiutip annertussusaanut aamma ajornartorsiummut qanoq iliorluni qaangiiniarluni aaqqiissutissaq pillugu apeqquteqaat aallaavigalugu oqallinnissamik siunnersuut.

Inatsisartunut ilaasortaq Asii Chemnitz Narup, Inuit Ataqatigiit

Inuit Ataqatigiinni suleqatitta Asii Chemnitz Narup-ip saqqummiusnaanut pingaaruteqartumut aamma pingaaruteqartuurtussamut qujavugut.

Meeraq kinaluunniit inunngortoq angajoqqaaminit nunaqqatiminillu inooqatigiinnissamut perorsarneqartoq inuiaqatigiinni pisuussutaavoq.

Meeqqat ilaasa ullaakkut iteraagamik eqqarsaatai ukuusarput: "atuarfimmi eqaarsaarutissakka kanngugaakka, ateraasakka eqaarsaarutaanngillat aammalu eqaarsaareeruma uffaleruma quliutissaqanngilanga."

Aamma " Ullaaq manna ullaakkorsiutissaqarpunga? Aamma unnugu nerisassaqaassaanga?."

Pissutsit atuuttut annernarput, piviusuuvorlu nunatsinni piitsuussuseq ajornartorsiutitsinni tamani qitiujuarmat.

Inuit Ataqatigiit naalakkersuinikkut piitsuussutsip akiornissaanut suleqataarusuppugut, tamassilu maani inersuarmiittusi nalunngilara aamma ilissi piumassuseqartusi.

Meeqqat piitsuunerat tassaavoq inuiaqatigiinni qanoq inissisimanitsinnit takutitsisoq, eqqortuunerusinnaavorli naqissusissallugu inuiaqatigiittut aaqqiissuussaansinnit tassaagatta uagut inersimasut

INUIT ATAQATIGIIT INATSIARTUNI



aaqqiissutissarsiornerlunnitsigut piitsuusitsisuusut. Tamanna unneqqarissumik oqaatigissavarput. Naalakkersuinikkut akiugassatta pingaarnerpaaq salliutittariaqagarput aamma pikkoriffiginerusariaqagarput.

Ukiuni qulini kingullerni piitsuussutsimut killigititaqalernermit suliniarneq Inuit Ataqatigiinni aallussimavarput, ilaatigut Inatsisartuni 2018-mi siunnersuuteqarsimalluta. Ullumikkumut sulii suliaasaqarpugut, isumalu tamanna sulii qimassimangilarput.

Inatsisartuni suleqatitsinnut naalakkersuinikkut siunnerfiit naleqatitallu makku piitsuussutsimut akiuniarnermi tikkuukkusuppagut:

Siullertut: Partiini pitsaanerusumik piitsuussutsimut akiuniarnerput suleqatigiissutigisariaqarparput. Sulinitinni inuit piitsuusut isiginiarlugit sullillugillu, taava kikkut aammalu qanoq pilliuteqarnerusoqartoqartariaqarnera tullinnguuttarlugu. Amerlavallaatigut aaqqiissutissanut pinatalu aaqqiissutissanut sapiissuseqarata suleqatigiissinnaajunnaartarnerput inuiaqatigiinnut annaasaqaatinngortarpoq. Tamanna qaangerniarniartigu, eqqaamajuartigillu aallarniutinni meeqqat qanoq atugaqarlutik ullaakkut itertarnerat.

Aappaattut: Aaqqissuussaarneput apeqqusersinnaasariaqarparput, ukiuni amerlavallaani akileraartarnikkut aaqqiissuuseqqinnissamik eqqartuivugut. Ataatsimiititaliarsuit siunnersuisoqatigiillu naqissusererpaat aningaasatigut pigissaartut aamma pissakinnerusut akornanni ikeq annertuallaartoq, tamannalu inuiaqatiinni naligiinnginnermik pilersitsisuusq. Taammaat maanna oqariartuutigilarput, akileraartarnikkut aaqqiissuuseqqinnissaq oqaasiinnaatinnagu suliariniartigu. Inuit Ataqatigiinniillu nalornitata oqaatigissavarput, aaqqiissuuseqqinnermi pingaarnertissagatsigit isertitakinnerusut, angajoqqaat kisimiillutik perorsaasut aamma utoqqalinersiaqartut, siusinaartumillu soraarnerussutisiaqartut atugarisaat.

INUIT ATAQATIGIIT INATSIARTUNI



Suleqatigiinnitsigullu paaseqatigiiffissarsiornissarput soorunami aamma ilisimaaraarput.

Pingajuattut: Inatsisilortarpugut, amerlanertigullu Inatsisiliagut inunnut tunngassuteqartut kommuunit naammassiniarlugit sukataarlutik sulissutigisarpaat. Suliaq naammanginartumik naammassinissaanut kommuuninit suleqatiginerusariaqarpagut. Piitsuussuseq inatsisiliornerinnakkut akiorneqarsinnaangilaq, inuiaqatigiinnili susassaqtunit tamanit ukkatarineqartariaqarluni. Aaqqiissutissani tamani ataatsimut isiginninneq qiviarnerusariaqarparput, inatsisiliagummi ima sanaajupput allannguigut tamarmik akileraartarnikkut aaqqiussuussinitsinnut nikisitsisarlutik.

Taamatut saqqummiussereerluta Naalackersuisugut ima piumasaaqateqarfigissavagut: piitsuussutsimut akiuneq aallartillugu akileraartarnikktu aaqqiussusseqqinneq suliariniartigu, allannguneq sivisusinnaavoq, kinguarsaannarutsiguli piitsuussuseq annertunerujartuinnassaaq.

Partiinut inersuarmitunut: piitsuussutsimut akiuniarsinnaassuseqarpugut, sulianut annertuunut aningaasaliisinnaassuseqarluta aalajangiisarpugut, taamatuttaaq piitsuussutsimut akiuniarnerput suliassatut annertuutut isigalutigu suleqatiissutiginiartigu- utaqqiinnarata iliuseqarnikkut akisussaassuseqarfigitigu.

Qujanaq